

«Il chantun è in'unfrenda e betg in culpant»

Societad grischuna dals impressaris

DA GION NUTEGN STGIER / ANR

■ **Sulet in impressari ha prendì il pled durant la radunanza generala a Laax. Markus Derungs, il president dals impressaris da construcziun, ha concedì ch'els hajan fatg sbagls. L'associaziun ha vinavant fidanza en ses mainafatschenta Andreas Felix.** L'atmosfera tar la radunanza generala da la Societad grischuna dals impressaris a Laax era da cumparegliar cun ina «messa bassa». Intgins impressaris han er manegià che darir hajan els segir betg, suenter la critica en connex cun las cunvegns da pretschs en la bransch da construcziun. Davart ils commembers da la societad è l'interess per la radunanza generala er gia stà per in pau pli grond, dentant davart da las medias ha l'occurrenza anc mai attratg tants schurnalists e schurnalistas, e quai na be dal Grischun, mabain da l'entira Svizra.

«Quai è il maletg da nossa valurisaziun»

Gist a l'entschatta da ses pled introductiv ha Markus Derungs, il president chantunal dals 120 impressaris da construcziun, fatg intginas ponderaziuns pertutgant il concurs da la firma Pitsch SA. L'associaziun deploreschia fitg ch'il manaschi cun 200 emploiads haja gi da far quest zap. Markus Derungs ha ditg: «Quai è il maletg e la realitad da la valurisaziun da la nossa bransch». El ha er confermà d'avair savì nagut da la situaziun finanziaria e critica dal travagl cun la sedia principala a San Murezzan.

El, ils commembers da suprastanza ed er il mainagestiu da l'uniun deploreschian fitg che intgins manaschis hajan cunterfatg a la lescha da cartel. Per l'associaziun era cler, e quai saja er en il futur uschè, ch'ils commembers sa tegnan a las regulaziuns existentas ed er a las leschas.

A las preradunanzas organisadas da l'uniun saja vegnidas fatgas cunvegns illegalas, e che nagin da l'associaziun saja stà da la partida e vess gi urgent d'esser preschent per intervegnir, saja stà in grond sbagl. Nus essan simplamain stads memia da buna fai ed avain cunzunt er gi la clera fidanza en noss commembers en l'Engiadina Bassa, ha menziunà Markus Derungs. I saja vegnì fatg sbagls, ed el sa perstgisia era per quels. Oz n'hajan pli lieu talas radunanzas per cunvegns da pretschs, e dal reminent saja quellas vegnidas annulladas gia il 2008, ha punctuà il president dals impressaris da construcziun.

Pli che be in duair

El persunalmain sco er l'associaziun saja obligada envers ils impressaris che lavuran correct, che prestan buna lavur cun lur passa 5000 emploiads da procurar per ina

contribuziun impurtanta per la societad e per l'avegnir da noss chantun, ha ditg Markus Derungs. Urgent saja d'impedir da quels cas che chaschunian ch'in entir chantun, in'entira regiun, in'entira bransch s'avanza en ina mala glisch. Envers la Cumissiun da concurrenza, la CumCo, saja l'uniun ed er il mainagestiu Andreas Felix stads transparents e la cumissiun haja er giuditgà il mainagestiu sco vardaivel, ha accentuà l'impressari da Tavau. Markus Derungs ha er ditg che l'associaziun na saja betg sentenziada, ella haja persuerter da surpigliar ils custs da procedura. Da guardar saja ussa en l'avegnir, star tar ils fatgs e cunzunt procurar che la bransch da construcziun e ses patruns survegnian danovamain la fidanza che mintgin meritia, ha ditg Markus Derungs. Punctuà ha el alura era che Andreas Felix resta vinavant mainagestiu da l'associaziun cun el prestar buna lavur, cun el

er esser be in carstgaun che saja vegnì involvì en in affar cun in resun naziunal, er sche da lez temp n'era el anc mainagestiu da l'uniun.

Il process è inacceptabel

Cusseglier guvernativ Mario Cavigelli ha ditg ch'el deploreschia fitg che entras quest scandal da pretschs saja ussa er ils buns impressaris en in focus malempenaivel senza esser culpants. Quai che saja succedì en l'Engiadina Bassa e l'entir process saja politicmain, economicmain e socialmain inacceptabel. Il chantun haja ussa da far in'emprima survista, analisar la situaziun, rimnar bleras infurmaziuns e lura reagir e trer las consequenzas e mesiras, ha ditg il schef dal departement da construcziun. Ditg ha el er quai: «Il chantun è in'unfrenda da l'entir scandal da construcziun, e betg forsia in culpant».



Mario Cavigelli (san.) il cusseglier guvernativ, ed Alois Vinzens, il director da la Banca Chantunala, han er gi da dar pled e fatg ad intgins schurnalists.



Resta vinavant mainagestiu das impressaris da construcziun dal Grischun: Andreas Felix.